



BOSNA I HERCEGOVINA  
PARLAMENTARNA SKUPŠTINA  
BOSNE I HERCEGOVINE  
**PREDSTAVNIČKI DOM**

Broj: 01-011-1115/03.  
Sarajevo, 07. avgusta 2003.

**Z A P I S N I K**

sa 17. sjednice Predstavničkog doma Parlamentarne skupštine Bosne i Hercegovine,  
održane 07. avgusta 2003.gdoine

Sjednica je počela u 10,10 sati. Prisustvovalo je 36 poslanika. Odsustvo su opradali Hasan Muratović, Azra Hadžiahmetović, Nenad Mišić, Tihomir Gligorić i Munib Jusufović.

Iz Vijeća ministara sjednici su prisustvovali:predsjedavajući Adnan Terzić, ministri Ljerka Marić i Mirsad Kebo, zamjenici ministara Haris Bašić, Lidija Topić, Ivica Marinović, Dragan Mektić i Momir Tošić, te Nedžad Hadžimusić, direktor političke multilaterale u MVP. Sjednici je prisustvovao i Dragan Kapetina, savjetnik za vojna pitanja u Predsjedništvu Bosne i Hercegovine.

Iz međunarodnih organizacija sjednicu su pratili: Dino Bjelopoljak – OHR, Dario Šikuljak - OSCE, Mirjana Sirčo - CPCD, Bogdan Nikolae – Rumunska ambasada i Ivica Čavar – Centar civilnih inicijativa.

Predsjedavajući Džaferović dao je uvodne napomene u vezi s dopunom prijedloga dnevnog reda i obrazložio uvrštavanje novih tačaka o kojim se usaglasio Prošireni kolegij. U ime užeg Kolegija predložio je da se u dnevni red uvrsti davanje saglasnosti za ratifikaciju Konvencije o priznavanju kvalifikacija koje se odnose na visoko obrazovanje u evropskoj regiji.

**Zlatko Lagumdžija**, u diskusiji povodom dnevnog reda, iznio je dva prijedloga za dopunu:

- da se u dnevni red uvrsti Prijedlog rezolucije o obustavi povećanja plaća u institucijama BiH, koji je podnio na sjednici 27. juna i
- da se u dnevni red uvrsti informacija Vijeća ministara u vezi s aktivnostima vezanim za izgradnju Koridora V-c.

**Miloš Jovanović** je prigovorio što su u prijedlog dnevnog reda uvršćene nove tačke, iako se s tim usaglasio Prošireni kolegij. Naglasio je da je nekorektno očekivati od poslanika da raspravljaju i odlučuju o dodatnim tačkama kad kod sebe nemaju ni materijale.

Povodom diskusija Z. Lagumdžije i M. Jovanovića govorio je predsjedavajući Vijeća ministara Adnan Terzić.

Poslije diskusije predsjedavajući Doma Šefik Džaferović na glasanje je prvo dao prijedlog Kolegija da se u dnevni red uvrsti davanje saglasnosti za ratifikaciju Konvencije o priznavanju kvalifikacija koje se odnose na visoko obrazovanje u evropskoj regiji. Prijedlog je usvojen jednoglasno.

Potom je predsjedavajući upoznao Dom da još nije stigao izvještaj Administrativne komisije o razmatranju Prijedloga rezolucije Zlatka Lagumdžije. Naglasio je da misli da nema

nikavog opradanja što Administrativna komisija do danas nije uradila taj posao. Predložio je da Dom usvoji zaključak kojim će se obavezati Administrativna komisija da do sljedeće sjednice Doma zauzme konačan stav o Rezoluciji i u pisanoj formi o tome obavijesti Dom.

Dom je većinom glasova (3 suzdržana) usvojio predloženi zaključak.

Dalje je predsjedavajući na glasanje dao prijedlog Zlatka Lagumdžije da se u dnevni red uvrsti informacija Vijeća ministara o aktivnostima vezanim za Koridoru V-c.

Od 34 prisutna poslanika ZA je glasalo 15, protiv 9, suzdržalo se 8. Glasajući po entitetima iz Federacije BiH ZA je glasao 9, iz Republike Srpske 6. Predsjedavajući je konstatovao da prijedlog nije dobio entitetsku većinu i da će se odmah u Kolegiju provesti usaglašavanje.

Martin Raguž je u kratkoj diskusiji rekao da želi da se zaključak Doma poštuje i da je na prošloj sjednici Dom usvojio zaključak da nas Vijeće ministara redovino informiše, te da nema potrebe ponovo zaključivati nešto što je Dom već zaključio.

Šefik Džaferović je rekao da je Dom na prošloj sjednici informiran o Koridoru V-c, da misli da se ne treba na svakoj sjednici podnositi informacija, te da je zbog toga protiv uvrštavanja informacije na ovoj sjednici. Zatim je konstatovao da u Kolegiju nema saglasnosti pa je prijedlog dao na glasanje u drugom krugu.

Iz Federacije BiH protiv prijedloga glasalo je 9, iz Republike Srpske jedan poslanik. Prema tome, u drugom krugu glasanja ni iz jednog entiteta nije bilo 2/3 protiv, pa je stoga Informacija o Koridoru V-c uvrštena u dnevni red.

Predsjedavajući Džaferović je proglasio da je za 17. sjednicu usvojen sljedeći

#### D N E V N I R E D:

1. Zapisnik sa 15. i 16. sjednice Predstavničkog doma,
2. Poslanička pitanja i odgovori,
3. Zahtjev Vijeća ministara za razmatranje Prijedloga zakona o komunikacijama po hitnom postupku, u skladu s članom 105. Poslovnika,
4. Zahtjev poslanika Filipa Andrića za razmatranje Prijedloga zakona o izmjenama i dopunama Zakona o koncesijama Bosne i Hercegovine po hitnom postupku, u skladu s članom 105. Poslovnika,
5. Zahtjev Vijeća ministara za razmatranje Prijedloga zakona o izmjenama i dopunama Zakona o izbjeglicama iz BiH i raseljenim osobama u BiH po hitnom postupku, u skladu s članom 104. Poslovnika).
6. Zahtjev Vijeća ministara za razmatranje Prijedloga zakona o vazduhoplovstvu Bosne i Hercegovine, po hitnom postupku, u skladu s članom 104. Poslovnika,
7. Razmatranje prijedloga dokumenta "Sigurnosna politika Bosne i Hercegovine",
8. Nacrt Izvještaja evaluacije o Bosni i Hercegovini Sekretarijata GRECO (povjerljivo),
9. Mjere za osiguranje samoodrživog razvoja Ureda za reviziju finansijskog poslovanja institucija BiH (po zaključku Doma usvojenom na 12. sjednici 22.04.2003. godine),
10. Informacija Izborne komisije BiH o radu općinskih izbornih komisija i centara za registraciju birača,
11. Davanje saglasnostiza ratifikaciju Konvencije o priznavanju kvalifikacija koje se odnose na visoko obrazovanje u evropskoj regiji,
12. Informacija Vijeća ministara o aktivnostima na izgradnji Koridora V-c.

#### **Ad – 1:** Zapisnici s 15. i 16. sjednice Predstavničkog doma

U vezi s Zapisnikom s 15. sjednice diskutovala je Ruža Sopta. Predložila je da se u zaključku usvojenom povodom Strategije za sprovođenje Aneksa VII Dejtonskog mirovnog

sporazuma, doda da će zaključak koji pripremi Komisija za ljudska prava, imigraciju, izbjeglice i azil, postati sastavni dio Strategije.

## **Ad – 2:** Poslanička pitanja i odgovori

Komentare na odgovore na poslanička pitanja imali su Muhamed Moranjkić, Petar Kunić i Seada Palavrić.

Poslanička pitanja postavili su poslanici kako slijedi:

### **Nikola Špirić:**

«1. Zašto Savjet ministara nije ispoštovao zaključak ovog doma da u roku od 90 dana po usvajanju Budžeta institucija BiH predloži rebalans Budžeta? Šta će učiniti ovaj Dom ukoliko se ni do 01.09.2003. godine ovaj posao ne završi?»

2. «Šta će Ministarstvo bezbjednosti uraditi da otkrije i sankcioniše vinovnike napada na direktora Sarajevske pivare gospodina Hilmu Selimovića, kao i vlasnika industrije mesa Stanića?»

### **Mehmed Suljkanović:**

«1. Da li realizacija projekta Fatničko polje, odnosno Gornji horizonti može prijetiti gubitkom voda u rijekama Bregavi, Buni i Bunici, sa katastrofalnim ekološkim posljedicama?»

2. Ko je odgovoran za operativnu realizaciju projekta CIPS i da li je Vijeću ministara, odnosno resornom ministarstvu poznato šta se dešava kada građani žele ostvariti pravo na dobijanje nove lične karte?»

3. Da li je urađen program rada Vijeća ministara za 2003. godinu i ako jeste kada će Parlamentu dostaviti taj program?»

### **Miloš Jovanović:**

«Da li se prostorije u kojima se održavaju sjednice Skupštine i komisija tajno snimaju za potrebe nekih medija ili možda obavještajnih službi, kako bi se, u zavisnosti od potrebe, mogli zloupotrijebiti.»

### **Sead Avdić:**

«Tražim stav Vijeća ministara o zahtjevu Vlade Srbije i Crne Gore o izmještanju granične linije između BiH i Srbije i Crne Gore sa osovine rijeke Drine na lijevu obalu, posebno kod hidroenergetskih objekata HE Zvornik i HE Bajina Bašta. Kako hidropotencijal rijeke Drine pripada BiH i SCG posebno je bitna informacija ko i u čije ime eksploatira ova dva hidroenergetska objekta i da li su oni predmet sukcesije bivše SFRJ.»

### **Muhamed Moranjkić:**

«Koji su sve sadašnji i bivši zvaničnici u vlastima – bilo izvršnim, bilo zakonodavnim (po saznanju zvaničnih organa države) – od opština, kantona, entiteta i Distrikta Brčko, pa do vrha države BiH – umiješani u kriminal? Protiv koga su procesuirani postupci, protiv koga nisu? Usput, tražim – protiv koga su podnesene krivične prijave na bilo kom nivou i protiv kojih je lica međunarodna zajednica, uključujući i SAD, pokrenula postupak u bilo kom obliku, a posebno kada je u pitanju klasični kriminal, promet droga i opojnih sredstava, organizacija i djelovanje političke mafije, terorizam, pljačka države i naroda, manipulacija s kriminalnim predznakom u privatizaciji i razbojništva svih oblika, uključujući i genocid.»

### **Zlatko Lagumdžija:**

«1. Zašto Vijeće ministara toleriše kašnjenje uvođenja PDV-a koje je najavljeno u nekim medijima? U tom svjetlu:

- koji je operativni plan i program sa vremenskim rokovima i nosiocima aktivnosti na uvođenju PDV-a najkasnije za godinu i pol dana od danas, kako je prolongirani rok glasio?

- ko je ovlastio iz Vijeća ministara, ukoliko jeste, predstavnike međunarodne zajednice da javnost informiše o kašnjenju PDV-a – uvođenja za 1.1.2006. što znači da reforme čekaju 4 godine, i ko je od domaćih institucija odgovoran za ovo kašnjenje?

2. Šta radi Vijeće ministara na zaštitu domaćih proizvođača mesa i ko je odgovoran za najavljeni uvoz 9.000 tona mesa kojim su se prerađivači doveli u privilegovan položaj na štetu proizvođača. Koje mjere Vijeće ministara planira da se zaštite i prerađivači i proizvođači mesa.

3. Šta predsjedavajući Vijeća ministara lično zna i da li je i šta poduzeo da se upozna i da nešto učini po pitanju terorističkih napada koji su se desili u Sarajevu u zadnjih 48 sati? Da li je predsjedavajući Vijeća ministara o tome informisan i šta zna i šta misli uraditi na raskrinkavanju i sankcionisanju organizovanog kriminala koji ima političke i medijske pokrovitelje nad terorističkim aktima u kojima su za sada stradale obitelji Stanić i Selimović?

#### **Ivo Miro Jović:**

«1. Zašto je raspisan javni poziv (za dodjelu donacija) 23. srpnja 2003. godine za aktivnosti koje se provode u razdoblju od 16. srpnja, što sigurno izaziva sumnju u dobru namjeru, a pogotovo ako se sve to dešava u vrijeme godišnjih odmota. U tim aktivnostima nije sudjelovao niti jedan čovjek iz reda Hrvata pa nije čudo što su izostavljene dvije županije gdje očekujemo veliki povratak Hrvata?»

«2. Dokle se stiglo sa rasvjetljavanjem «slučaja» pokojnog ministra Joze Leotara? Šta je sa isplaćenim sredstvima za navodno otkrivanje ubojica? Dokle su stigle istražne radnje za ovih 6 godina, kako je ubijeno 9 Hrvata Travnika (povratnici)?

#### **Mirsad Ćeman:**

Prije rata veliki broj radnika iz BiH je radio u susjednim republikama tada jedinstvene SFRJ, posebno u Hrvatskoj, Sloveniji itd. Nakon rata ogromnoj većini njih nije omogućeno da nastave rad, odnosno uspostave ponovo radno-pravni status u preduzećima u kojima su radili, a otkaze su dobili nerijetko kao vid pritiska i iz drugih nelegalnih razloga. Uglavnom nisu bili u mogućnosti voditi sporove za zaštitu svog prava ni tada ni danas. Ovi ljudi misle da državni organi o ovom pitanju uopće nisu vodili računa prilikom pripreme, odnosno zaključivanja međunarodnih sporazuma BiH, prije svega, sa susjednim a ni drugim državama.

Može li Ministarstvo za ljudska prava i izbjelice BiH i šta može učiniti, a predlažem da poduzme mjere, da se prava sada nezaposlenih ljudi konačno zaštite, tj. da tek tako ne izgube radno-pravni status, da nastave raditi posao u preduzećima u kojima su radili odnosno da dobiju drugi adekvatan posao.

#### **Seada Palavrić:**

1. «Tražim informaciju o broju zaposlenih i plaćama svakog budžetskog korisnika, dakle, korisnika Budžeta Bosne i Hercegovine.»

2. Da bi građani mogli početi izvoziti svoje proizvode na tržište EU, tražim da se odgovori: Koji su to propisi? Koja oprma je potrebna? Koja su sredstva finansijska potrebna i koji su subjekti koji su odgovorni da osiguraju ovu pogodnost koju je EU pružila b-h građanima?

3. Koja institucija na nivou države BiH može riješiti problem 18 hiljada ljudi koji ne mogu da koriste svoja socijalna prava. Postoji li takva institucija? Ako ne postoji, šta je potrebno da učinimo da bi država raspolagala takvom institucijom i rješavala barem ove međudržavne sporove iz oblasti socijalnih prava naših građana.

### **Filip Andrić:**

Pokrenuo je inicijativu da Klub hrvatskog naroda u Domu naroda hitno podnese zahtjev Ustavnom sudu BiH za ocjenu ustavnosti Odluke Visokog sudskog i tužilačkog vijeća o imenovanju sudija i tužilaca u Herceg-bosanskoj županiji.

**Ad – 3:** Zahtjev Vijeća ministara za razmatranje Prijedloga zakona o komunikacijama po hitnom postupku, u skladu s članom 105. Poslovnika,

U okviru ove tačke nije bilo diskusije.

Sa 26 glasova za i 3 protiv (po entitetima – iz FBiH za glasao 21, a iz RS 6), usvojen je zahtjev Vijeća ministara za razmatranje Prijedloga zakona po članu 105. Poslovnika.

Potom je Dom – sa 27. glasova za i 3 suzdržana (iz RS za 6, iz FBiH 19) usvojio Zakon o komunikacijama.

**Ad – 4:** Zahtje poslanika Filipa Andrića za razmatranje Prijedloga zakona o izmjenama i dopunama Zakona o koncesijama Bosne i Hercegovine po hitnom postupku, u skladu s članom 105. Poslovnika

Filip Andrić podnio je obrazloženje zahtjeva za hitni postupak, kao i obrazloženje predložene izmjene.

U diskusiji su učestvovali Selim Bešlić, Seada Palavrić, Nikola Špirić, Beriz Belkić, Sead Avdić, Momčilo Novaković, Vinko Zorić i Jozo Križanović.

U diskusiji su izražena suprotstavljena mišljenja i o zahtjevu za razmatranje predloženog zakona po hitnom postupku i o sadržaju Prijedloga zakona.

Poslije diskusije, na zahtjev Kluba poslanika SDS-a, predsjedavajući je dao pauzu od 30 minuta.

Nakon pauze predlagač zakona Filip Andrić obavijestio je Dom da i nakon diskusije stoji na stanovištu da je zakon jednostavan i da ne zadire u druge članove zakona, ali da je, uvažavajući nastojanja većine poslanika i klubova da se ostavi mogućnost za dužu rapsravu o Prijedlogu zakona, spreman prihvatiti inicijativu da svoj zahtjev preinači da se Prijedlog zakona razmatra po članu 104. umjesto po članu 105. Poslovnika, uz uslov da se Dom danas izjasni o proceduri po članu 104. kako se ne bi gubilo vrijeme.

Predsjedavajući Džaferović konstatovao je da je predlagač odustao od zahtjeva za hitnu proceduru po članu 105. pa je na glasanje dao zahtjev Filipa Andrića da se Prijedlog zakona o izmjenama i dopunama Zakona o koncesijama BiH razmatra po članu 104. Poslovnika Doma.

Od 34 prisutna poslanika za je glasalo 20, a protiv 14 poslanika. Iz Federacije BiH za je glasalo 11, iz Republike Srpske 8.

Predsjedavajući Džaferović konstatovao je da Dom usvojio zahtjev Filipa Andrića da se Prijedlog zakona o izmjenama i dopunama Zakona o koncesijama razmatra po članu 104. Poslovnika Doma.

### **Ad – 5. i 6.**

Predstavnički dom je jednoglasno – sa 35 prisutnih poslanika – usvojio zahtjeve Vijeća ministara da se po članu 104. Poslovnika razmatraju:

- Prijedlog zakona o izmjenama i dopunama Zakona o izbjeglicama iz BiH i raseljenim osobama u BiH i
- Prijedlog zakona o vazduhoplovstvu Bosne i Hercegovine.

**Ad – 7:** Razmatranje prijedloga dokumenta "Sigurnosna politika Bosne i Hercegovine"

Zamjenik ministra sigurnosti, Dragan Mektić, podnio je Domu obrazloženje dokumenta «Sigurnosna politika Bosne i Hercegovine».

Poslije izlaganja D. Mektića predsjedavajući Kluba HDZ – Demokrišćani zatražio je pauzu.

Nakon pauze Vinko Zorić je rekao da je stav Kluba da ne bi trebalo u Parlamentu razmatrati Dokument a da se o tome ne očituju članovi Predsjedništva. Iz toga razloga, kada su vidjeli da niko iz Predsjedništva nije prisutan sjednici, zatražili su pauzi i da su zauzeli stav da će dokument samo primiti k znanju, bez vođenja bilo kakve rasprve.

U okviru ove tačke u diskusiji su učestvovali: Beriz Belkić, Mirsad Ćeman, Jozo Križanović, Momčilo Novaković, Nikola Špirić, Nijaz Duraković i Muhamed Moranjkić.

Poslije diskusije poslanika savjetnik jednog od članova Predsjedništva BiH, Dragan Kapetina, pojasnio je poslanicima određena proceduralna pitanja u vezi s donošenjem dokumenta «Sigurnosna politika BiH».

Predsjedavajući je, nakon kraćeg izlaganja D. Kapetine, dao kratku pauzu i pozvao predsjedavajuće klubova na konsultacije u vezi s zaključcima.

Nakon pauze predsjedavajući je iznio prijedlog zaključaka, povodom koji su diskutovali Nikola Špirić, Nijaz Duraković, Momčilo Novaković, Seada Palavrić, Šefik Džaferović, Jozo Križanović, Beriz Belkić i Milorad Živković.

Kako su izneseni suprotstavljeni stavovi o prijedlogu zaključaka, predsjedavajući je dao dužu pauzu i pozvao predsjedavajuće klubova na sjednicu Proširenog kolegija radi usaglašavanja teksta zaključaka.

Poslije pauze Dom je povodom dokumenta «Sigurnosna politika BiH», usvojio sljedeći

### **Z A K L J U Č A K**

1. Predstavnički dom Parlamentarne skupštine Bosne i Hercegovine podržava dokument «Sigurnosna politika Bosne i Hercegovine», dostavljen od Predsjedništva Bosne i Hercegovine.

2. Predstavnički dom traži od Predsjedništva i Vijeća ministara Bosne i Hercegovine da u roku od 90 dana u tekst dokumenta ugrade reformska rješenja u Bosni i Hercegovini iz oblasti sigurnosne politike i dostave Dokument Predstavničkom domu na usvajanje.

Zaključak je usvojen jednoglasno – u momentu glasanja prisutan 31 poslanik.

**Ad – 8:** Izvještaj evaluacije o Bosni i Hercegovini Sekretarijata GRECO

U diskusiji povodom ove tačke dnevnog reda učestvovali su Adem Huskić, Mirsad Ćeman, Muhamed Moranjkić i Ljiljana Milićević. Potom je govorio Dževad Hadžimusić, direktor političke multilaterale u MVP i šef Stalne delegacije BiH u GRECO.

Povodom ovog izvještaja Dom je usvojio

### **Z A K L J U Č A K**

1. Predstavnički dom Parlamentarne skupštine Bosne i Hercegovine podržava Izvještaj evaluacije o Bosni i Hercegovini, s prijedlozima i sugestijama Ustavno-pravne komisije i Komisije za ljudska prava, imigraciju, izbjeglice i azil.

2. Predstavnički dom zadužuje Ustavno-pravnu komisiju i Komisiju za ljudska prava, imigraciju, izbjeglice i azil da vrše superviziju implementacije konačnog Izvještaja evaluacije o Bosni i Hercegovini.

Za zaključak glasalo je 30 prisutnih poslanika.

**Ad – 9:** Mjere za osiguranje samoodrživog razvoja Ureda za reviziju finansijskog poslovanja institucija BiH (po zaključku Doma usvojenom na 12. sjednici 22.04.2003. godine)

Kratke uvodne napomene dao je predsjedavajući Džaferović.

Dom je jednoglasno (prisutno 30 poslanik) prihvatio Mjere za osiguranje samoodrživog razvoja Ureda za reviziju finansijskog poslovanja institucija BiH koje je dostvio Ured za reviziju.

**Ad – 10:** Informacija Izborne komisije BiH o radu općinskih izbornih komisija i centara za registraciju birača

Povodom Informacije Izborne komisije diskutovali su Beriz Belkić, Selim Bešliagić, Miloš Jovanović i Vinko Zorić.

Dom je u vezi s Informacijom usvojio sljedeći

### **Z A K L J U Č A K**

1. Predstavnički dom Parlamentarne skupštine Bosne i Hercegovine prihvata Informaciju Izborne komisije Bosne i Hercegovine o radu općinskih izbornih komisija i centara za registraciju birača.

2. Zaduzuje se Ustavno-pravna komisija da održi sastanak s Izbornom komisijom Bosne i Hercegovine i da Domu predloži rješenja koja bi razriješila probleme evidentirane u Informaciji u vezi s centrima za registraciju i lokalnim izbornim komisijama.

**Ad – 11:** Davanje saglasnostiza ratifikaciju Konvencije o priznavanju kvalifikacija koje se odnose na visoko obrazovanje u evropskoj regiji

Dom je jednoglasno dao saglasnost za ratifikaciju Konvencije o priznavanju kvalifikaciji koje se odnose na visoko obrazovanje u evropskoj regiji.

**Ad – 12:** Informacija Vijeća ministara o aktivnostima na izgradnji Koridora V-c

O akativnostim na izgradnji Koridora V-c dd podnošenja posljednje informacije na sjednici Doma Dom je upoznao predsjedavajući Vijeća ministara Bosne i Hercegovine.

U diskusiji su učestvovali Zlatko Lagumdžija, Beriz Belkić, Fatima Leho, Seada Palavrić, Nikola Špirić, Ivo-Miro Jović, Sead Avdić, kao i predsjedavajući Vijeća ministara Adnan Terzić, koji je dao odgovore na određena pitanja postavljena u diskusijama.

Poslije duže diskusije predsjedavajući Doma Šefik Džaferović složio se s ocjenom pojedinih poslanika da je diskusija izlazila iz okvira dnevnog reda. Napomenuo je da je Dom prošli puta usvojio zaključak koji je dugoročnijeg karaktera, a to je da Vijeće ministara ovaj dom povremeno informira o aktivnostima oko izgranje Koridora V-c. Zahvlio se predsjedavajućem Vijeća ministara na podnesenoj informaciji i zaključio tačku dnevnog reda.

Ovim je iscrpen dnevni red 17. sjednice.

Sjednica je završena u 19,00 sati.,

Sastavni dio Zapisnika je trnskript 17. sjednice Doma.

**S E K R E T A R**  
**PREDSTAVNIČKOG DOMA**  
**Branka Todorović**

**PREDSJEDAVAJUĆI**  
**PREDSTAVNIČKOG DOMA**  
**Šefik Džaferović**